

Kutambuka mu Etaata dya Kilombeeno Kipya.

Kipindji 2 : Bifundwe – Mukunkushi a mwina kukumiina.

Efile-Mukulu mafuku oso enka na kinangu kya kula kwakula na kipangwa kyaye ; su muntu ena kya kusepelesha Efile-Mukulu ; mbikishenkishe buwa ku wuka kipaso kya bidja kulombana. mwanda watudi nawo boso ngwashi misango ibungi, atwi sangwila banabeene eshinda na'shi bushito bwa kapu pa mwanda wa kwikala bu umune n'Efile-Mukulu ta bwikudi.

Kubanga ku kibangilo, Efile-Mukulu baadi olombola booso babaa kimbanga eshinda dyaye. Baadi akula na Adama ku kibangilo, bakwile na Nowa, Abalami, Isaka, Yakobo, Yosefu na Mosese na kunyima kwa mafuku mu kanwa sunga mwa ba mafumu na batemuki, atutemuna nka bano ba badikye. Mu kyakya kipindji, malondo a bibadi kala, ngimbo na malondo a butemuki a baadi afundwe na taadi kwanka bwa bipongo abifiki.

Bena Ebeleo 1:1-2 Etutentekyesha'shi : « Efile-Mukulu baadi aakula kala misuusa ibungi na mu bipaso bilekeene lekene, balungulanga basheetu mu batemuki, kufudiilo kwa aa mafuku, baakula kwatudi mu Mwana, bamutuulu mpyani a bintu byoso, kwadi'ye namu ngi kubapangile senga ». Ku muwa wa mufidibwe kifulo fumwetu ngi ku kankamikwa kwetu pa mwanda wa kwitu lambukisha Efile-Mukulu. Pa uno mwanda, malondo a muwa wa Fumwetu ngafundwe na aa kitshi kipindji kya kwibedi kilombeno kipya. Ingi mikanda ni ngi tentekibwe. Bino byoso mbi kumbashibwe mu kulombashibwa kwa Kikudi-E-Selele Binobino tatudi n'ebuku dikumbane. Twina kushinkamisha kwatusha tukulupilanga kwa bukwashi bwa Fumu mu eyi dyaye. Kileshesho, pa ba kishishe balongi bufuku bushima na kuloba kushi kukwata kintu, Fumu bebalungula bya badya kukita. Mpyele mu kwakula kwaye kwi Fumu atentekyesha'shi kuloba kwabo ta mbakwate kintu « Anka ku eyi dyobe, nakeele makondja ». Mpyele bakumiina ku eyi Fumu kukwata mishipa ibungi bu kipeta. Mpolo etulungula namu ni mu kingi kipaso bino : Mwanda ami, natambwile kwi Fumu kyakya namu kyandji mwinulambukishe » 1 Bena Kolente 11:23. Bawukanga'shi bino abikatukila kwi Fumu.

Tutaluule bingi bipindji bi pabwabo, bwakubanga, atulongo bibafikile bifundwe kwatudi : « Mwanda kashaa butemuki tabwafikile muyile kikyabe ki'eshimba dya muntu, anka bantu be selele b'Efile-Mukulu babakwile, bakunkushibwe na Kikudi-E-Selele ». 2 Mpyele 1:21. Kuno kwakula « bakunkushibwe na Kikudi-E-Selele nkulesha'shi mba lambukishibwe na Kikudi-E-Selele, nka bu bwato abu sukumwa na lupunga, baba be selele b'Efile-Mukulu takulwanga na Kikudi-E-Selele bwa ku funda mwanda kibaadi kunyima a mudimo yabo, Efile-Mukulu baadi awukisha kinangu kyaye mu kyakya kipaso.

Mpolo mulongi a Fumu tamwitulekye na mpaka muyile kubakatukiile bulambukishi bwaye, etulungula shi : « Byabya bakwetu, nenuwukisha'shi mukandu wibuwa unanenu lungwile ta ngwa kwi muntu nya. Mwanda ami, ntshimwiwutambule kwi muntu nya, suunga kulambukishiibwa, anka mu kufumbula kwa Yesu Kilisto » Bena Ngagateya 1:11-12. Akupu atungunuka na kwitulungula bi bakitshikile : « bwa kufumbula mwana'ye mwandji, byandya

kumulungula kwi mawumbo, binobino ntshimutambule mulango wa ku mbidi suunga wa ku mase, suunga ntshinakaminanga ku Yelushaleme kwi baaba babaadi batumibwe kumpala kwande, anka nendanga ku Alabi, na naalukanga ku Damase » Bena Ngalateya 1:16-17. Na kutenteka papa mu 2 bena Kolente 12:3, 4, 7 a fundu bino : « nawuku muntu ee byabya, (su bibaadi mu mbidi, su bibaadi paasha pa mbidi, ami ntanguuku, Efile-Mukulu ngi eebiyuku), eshi basemwinwe mu mpaladisu, na bapushiishe mayi ashii byakwakulwa ashii apeebe muntu matalwa akupatuula...Na byansha kwitumbisha pa mwanda wa bifumbulwe bya **kukanya**, bibampeebe bu mulobo mu mbidi, mwikewulu a satana mwanda wa kunkupila, byansha kwitumbisha ». Atupusha 'shi : Fumu ngi baadi amu lambukisha. Ku bino ngi kwatudi na kifulo mu mikanda yibungi ya mu kilombeeno kipya, ayi katukila kwi Mwanana mwi batumimbwe baaye. Kwi kitungo kya kulonda mayi aye lelo.

2 Timote 3:16-17 : « byoso mbiyokyelwe n'Efile-Mukulu na mbipwandjikiile kulambukisha, bwa kukookyesha, bwa kulumbuula bilubilo, bwa kuyiyisha mu kululama, muntu Efile-Mukulu ekale mulombane na mupwidikye pa mwanda wa mufubo ooso wi buwa ».

Tu taluule angi malongyesha a bino bishingatshilo :

1. Mwaku : « kuyokyelwa n'Efile-Mukulu » be kyate ku mwaku umune wa mu ki ngidiki « kwelwa muwa n'Efile-Mukulu ». Myanku yooso yo akula bekwiya'nsi : « ngi yokyelwe koodi » mwanda ngi tukye mukana moobe muyile abisamba milomo yoobe bula bwa mudibu oobe, meeso oobe abitukaa muwa wa mu efwafwa dyobe, abikiila ku bino bipindji bya mbidi. Kileshesho kipeela bu bibaadi Efile-Mukulu mutume eyi dyaye dibaadi diyokyelwe mwi bifubwanga bya mbidi mayi ee kulesha ki muyile mufundji anka Efile-Mukulu nabeene ngi mwi ayokyele.
2. Eyi dy'Efile-Mukulu di na « **muulo ukata** » adi lombola mwina kukumina mu bipaso byoso bya nshalelo pa senga : dina muulo pa mwanda wa :
 - a. **Kulongyesha** : kwamba'shi kwitulesha eshinda dya kulonda, twi lukalo lwa kulongyeshibwa efuku dyoso dya muwa wetu bwa ku wuka bya kukita mu nkalo yoso yatudi nayo, efuku dyoso bya kwenda kumpala, bwa kwenda muku lombolwa kwa Kikudi-E-Selele pa lukumino mwi Fumu Yesu, bya tudya kufika na bukome mu nshalelo a bwina Kiliksto ; suu atukyebe kukula mu ku wuka kw'Efile-Mukulu, twina lukalo lwa kwalukuula ku malongyesha ayokyelwe n'Efile-Mukulu na kwi akokyela.
 - b. **Kukokyesha** : Bifundwe bi mu kipimo kya nkalo yeetu mu bipindji byoso, pa bidi mu lukalo, a bi tulesha papa patudi balobeshe, abi pasusha muntu a munda, abi tulesha patudi baate kashinda ka kutshibuula Twina lukalo lwa kupusha bifundwe sunga mpa bi tusashila mwanda Efile-Mukulu etulungula.
 - c. **Kulumbuula** : Eyi dy'Efile-Mukulu tadi ketulungula peenda patudi ba lobeshe nya, anka na kwitu leesha kipaso kya eshinda dilulame . Umune a kishingatshilo kya Bena

Loono 119: 9 Alu leesha byanka : « mbikuni mwana mulume mukinga a bya kufikisha eshinda dyaye (ditooka) dilulame ? Ta penda kwilama muyile eyi dyobe » .

- d. **Ku yiyisha mu kululama** : Mwaku watshibwe bwa « kuyiyisha » a watshibwa bwa kulongyesha kwa kumpala kwa mwana. Mpolo bakwile pa mwanda wa bwana bwa 2 Timote 3:15, mukanda w'Efile-Mukulu awi tulambukisha kipaso kya kutambuka mu eshinda dilulame.
- e. **Muntu Efiel-Mukulu ekale mulombane** : Timote babangile nka bu mwana mukinga anka baadi akisha nguba mun kulonga Eyi dy'Efile-Mukulu (dyadya diyokyelwe) ba kudile na afika « muntu Efile-Mukulu, abi keekala nka pamune byabya kwi mwina kukumiina ooso alondo eshinda dimune'di. Pa senga bantu abakimbi kineemo, ma dipolome a bilongyelo bikata na ingi myasu pa mwanda wa nshaleelo, bukata, anka mbi kishekishe bwa kuwukibwa bu : « muntu Efile » ! Mosese baadi pangi bu muntu mukata a kyakya kipungo, mulongyeshibwe kalolo, baadi amweneka bu mpyani a bu fumu bwa mu Eshipitu, anka batshine kitshibilo kya kuleka byabya byoso pa mwanda wa mwilo w'Efile-Mukulu. Mba mufunde bu « muntu Efile -Mukulu ». Mu Ditelenome 31:1 Mu kipindji kya fudilo kya muwa waye Mosese baadi peepi n'Efile-Mukulu na kululama kwaye kuba ukibwe kwi booso. Nka byabya bimune, Mpolo aleesha Tilote eshinda dya kulonda bwa kulombasha lwalwa lutshi. Twina kya kulonda bano balume mu lukumiino mu kutambuka kwabo n'Efile-Mukulu.
- f. Muntu Efile-Mukulu mupwandjikile kwikala « **mukumbane na mulumbulwe kalolo** » kino kyakwilo akileesha bya kwikala mukumbane, na mwi lumbule bwa eshinda di kumpala kwetu. Twi kupwandjikisha bino bu kisaka kya bantu kiina lwendo lwina kepatshila kamune, muntu oso alongamisha bina lwendo : bilamba, bintu bya kwilongamisha ... mu kipaso kya shi patuuku ku shibo yaye ekale mwilombashe. A pa kekala bano bantu pamune, muntu oso ena mufubo mwamwa mu kisaka na bafiki mulombodi a bintu bina kisaka lukalo bwa kulombasha kepatshilo. Bi bintu byoso abipa umune na umune « mwilongamishe kalolo » sunga « mukumbane » bwa kepatshilo ka kisaka.

Kilombeeno Kikulu mbekifunde na mikanda ya malondo a yilondo pa mwanda wa mwilo w'Efile-Mukulu Isalele, bifundwe bya kusamuna na bya butemuki bikisheke nka pa mwanda wa kino kibundji . Isalele a bi mweneka bi bofule kwata ano mayi bu (kwilongena) bu wumune na Efile-Mukulu, bintu bikile na abi kafiki.

Kilombeeno kipya aki londo mufubo wa ntumbo wa Fumwetu Yesu Kilisto na pa bwaye kikyebe ky'eshimba nky'ashi mwilo waye utambukye na utumikye pamune bwa ntumbo ya kakongye ka bafikile mu kukita. Mu angi mapupwa aa londo, atu ka nkakamikibwa na kukokyela myalulo ayitusha kilombeeno kipya pa myanda yooso ayikeekala kwanka.

Bu byabidi'shi ni eyi dy'Efile-Mukulu kwatudi, twina kitungo kya kulonda patooka na ku shushula bifundwe. Ngi kutambuka mu etaata dya kilombeeno kipya.

Kano kakanda kaluulwe mu Kisongye mu Kabinda, mweshi wekumi mu 2024 kwi bakwetu bano :

- ✓ **Arthur NYINDU ASSANI,**
- ✓ **Esther KIMANKINDA YANGONGO**
- ✓ **Ivon KILUBA KIBAMBE,**